

*Pagtulon-an 16 — Panahon Sa  
Pagkabihag*

*(1 ug 2 Mga Hari ug 1 ug 2 Mga Cronicas)*

**KATUYOAN:** Sa pagpakita nga ang kalipay moabut kon kita magasalig ug magmasinugtanon kanunay.

Unsa man ang kalainan sa pagkamasinugtanon ug sa dili pagka-masinugtanon? Kon kita nagmasinugtanon nagpaila nga gibuhar nato ang mga butang nga gitugon nga maoy atong pagabuhaton. Kon kita masinupakon nagpaila nga atong gilapas o gisupak ang balaod.

Unsa man ang kalainan sa may kalipay ug sa walay kalipay? Ang kalipay maoy usa ka kahibulongan nga pagbati nga atong mabatonan kon makaayon kita sa maong mga butang. Ang walay kalipay maoy kaatbang niining butanga. Mahimo ba kita nga magmalipayon bisan kon kita nagmasinupakon? Dili, tungod kay ang atong konsinsya dili motugot niana; busa ang pagkamasinupakon ka-  
nagadala ug mga silot, dili lamang niadtong nakahimo ug kondili makadahig usab sa uban.

Sa panahon nga ang kasugoan gihatag sa Dios ug uban pa nga mga kabalaoran ngadto sa nasud sa Israel Iya silang gipahimangnoan nga ang mga panalangin nga ulan, kahayag sa adlaw, kalinaw ug kasigurohan, kadaugan batok sa mga kaaway maangkon nila kon ilang pagabantayan ang Iyang mga sugo. Apan kon sila nagahimo ug mga diyosdiyos alang sa pagpahimuot sa ilang kaugalingon, ug dili magabantay sa adlaw nga igpapahulay, ang mga tunglo ug kamatay, pagkasinalikway ug kapildihan batok sa ilang mga kaaway maoy ilang maangkon. Levitico 26

Si Solomon nasayud niining mga balaora apan sayo sa iyang mga pangandoy nagsugod na siya sa pagkamasinupakon. Gipilo ug gipilo sa gidaghanon alang sa iyang kaugalingon ang iyang mga kabayo, asawa, salapi ug mga bulawan, nga kining mga butanga idili sa Dios kaniya, Deuteronomio 17:17. Ang daghan kaayo iyang mga asawa nga walay pagtoo maoy nagahaylo ug nagadala kaniya halayo sa Dios ngadto sa pagsimba ug mga diyosdiyos. Ang

Dios wala mahimuot kang Solomon sa iyang mga gibuhat. Si Jehovah nagpahimangno kang Solomon sa pag-ingon, "Tungod kay ikaw wala makatuman sa akong tugon, ug sa akong kabalaoran nga akong ginasugo kanimo, sa pagkatinuod gision ko ang gingharian gikan kanimo ug ihatag ko kana sa imong ulipon," I Mga Hari 11:11.

Sa pagkamatay ni Solomon, ang iyang anak, si Rehoboam maoy nahimo nga hari. Ang mga tawo nanagbagulbol sa iyang pagdumala apan wala niya panumbalinga ug ania ang iyang tubag, "Ang akong amahan naghimo sa inyong yugo nga mabug-at, apan ako magadugang sa inyong yugo . . ." I Mga Hari 12:14. Ang mga Israelitas mialsa batok kaniya ug ang iyang gingharian nabahin sa duruha ka gingharian; gingharian sa Israel ug gingharian sa Juda.

Si Jeroboam mao ang unang hari sa bag-ong gingharian sa Israel. Siya nagpakasala sa hilabihan ug ang tanan nga nagasud-ong kaniya nagasunod sa iyang mga lakang ug sa katapusan sumala sa nasulat sa basahon ni profeta Oseas gipadala sa Dios ang gipanagna na nga daan nga mga paghukom. Ang mga sundalo sa Asur nabut ug gilibutan ang Samaria sulod sa tulo ka tuig ug nahulog sa kamot sa Aseria ug gibihag ang Israel ug sila gidala ngadto sa Aseria. "Ug mao kadto, tungod kay ang mga anak sa Israel nanagpakasala batok kang Jehovah nga ilang Dios . . ." 2 Mga Hari 17: 1-7. Imo bang namatikdan ngano ang DALAN SA MGA HARI sa atong dibuho nagkahiwihiwi—kini naingon ni ana tungod sa sala."

Kadaghanan sa mga hari human sa panahon ni Rehoboam mga dautan usab, apan dihay uban nga naninguha sa pagtugon sa mga balaod sa Dios. Ug pinaagi kanila miabut ang mga panalangin sa Dios. Apan kadaghanan nanagsalikway sa iyang mga pahimangno ug wala silay pagtagad sa mga sulogoon sa Dios. Ang katapusan nga hari sa Juda mao si Sedechias. Siya masinupakon ug dili manimati ug tambag. Si profeta Jeremias nagpahimangno kaniya nga nagingon, "Ug kining tibook nga yuta mahimong usa ka biniyagan, ug usa nga makapahibulong; ug kining mga nasura manag-alagad sa hari sa Babilonia sulod sa kapitoan ka tuig." Jeremias 25:11.

Si Nebucodonosor, ang hari sa Babilonia, misulong uban sa iyang mga sundalo batok sa Jerusalem. Ang hari nga si Sedechias naninguha sa pagkalagiw apan naapsan siya sa mga sundalo. Gipatay nila ang iyang mga anak atubangan sa iyang mga mata ug ang

mata usab ni Sedechias ilang gilusok. Gigapos siya sa talikala ug gidala siya ngadto sa Babilonia. Tawgon nato klini nga pagkabihag dinhi sa atong dibuho. Ang mga halangdon nga mga kaliwatan sa mga Judiyo gidala nga mga binihag ug ang uban mingkalagiw ngadto sa uban nga mga kanasuran. Gisunog ni Nebucodonosor ang templo sa Dios, ang palasyo sa hari, ug ang tanan nga mga matahum nga mga balay sa Jerusalem. Giguba sa mga sundalo ang mga ganghaan sa siyudad ug ang mga matahum nga mga haligi nga tumbaga ug gidala uban ang mga salapi ug bulawan sa templo ngadto sa Babilonia.

Imo na ba karon nga nasabtan unsa ka makalilisang ang dadangatan sa pagkadili masinugtanon?

1. Si Solomon kauban sa daghanan nga mga hari dili lamang kay walay kalipay kondili nagadala usab ug kasamok sa tibook nasud sa Israel.

2. Sa Roma 6:16 ang Dios nagpahibalo kanato nga kita mga inugyanan Kaniya nga atong ginasugot. Kon kita mosupak sa ilang sa Dios, gialagad ba nato ang Dios o ang ato ba nga kaugalingon. Maoy tinguha sa Dios nga managsugot kita sa pag-sangyaw sa Maayong Balita, 2 Tesalonica 1:8; ug gusto Niya nga managsugot kita sa atong mga ginikanan, Efeso 6:1-3; ug magkinabuhi sa pagkamatarung. Roma 6:16-17.

3. Adunay alawiton nga nagpamatuod kanato: "Saligan ta ug tauron Siya."

Human sa kapitoan ka tuig nga pagkabihag, ang Dios sumala sa Iyang ginasaad, mitugot nga pabalikon ang mga matinumanon ug masinugtanon sa pagbalik sa Jerusalem.

Kinsa man ang imong magmamando karon? Ang sala ba o ang Ginoong Jesu-Cristo? Nagahangyo Siya nga iyukbo ang imong kinabuhi kang Cristo karon kay Siya lamang ang makahatag ug kalipay.

**SAG-ULOHON:** "Kamong mga anak, kinahanglan managsugot kamo sa inyong mga ginikanan diha sa Ginoo, kay buhat kini nga matarung." Efeso 6:1.

**PAGTULON-AN 16 – PAGATUBAGON**

1-2-3. Basaha ang Levitico 26:1-13 ug isulat ang unom ka mga panalangin nga gisaad sa Dios sa nasud Israel kon magmasinugtanon sila Kaniya ug dili magsimba sa mga diyos-diyos.

- (1) . . . . .
- (2) . . . . .
- (3) . . . . .
- (4) . . . . .
- (5) . . . . .
- (6) . . . . .

4-5-6. Basaha ang Levitico 26:16,17,20,22,25,29,31,33,38, ug isulat ang unom ka mga silot o paghukom nga ipadala ni Jerubah sa Israel kon sila magmasinupakon sa balaod sa Dios ug magsimba sa mga diyosdiyos.

- (1) . . . . .
- (2) . . . . .
- (3) . . . . .
- (4) . . . . .
- (5) . . . . .
- (6) . . . . .

7. Apan ang Dios nahigugma sa Iyang mga katawohan ug tungod kanila mahinumdoman Niya ang uban sa ilang mga amahan. Levitico 26:45 .

8. Pagdibuho sa ubos ug hulagway sa DALAN SA GINGHARIAN ilalum sa dautan nga mga hari ug hangtud sa PAGKABIHAG ngadto sa Babilonia.

9. Ang mga Israelinhon nabihag ngadto sa Babilonia sulod sa  
ka tuig.
10. Isulat nga SINAG-ULO ang Efeso 6:1.